



*Jumat, 02 Oktober 2020*  
Ogen: Jeremia 32:36-44



*Perayaken Nggeluh*



**L**it dua si banci jadi i bas kegeluhen enda. Menang arah lebe, talu arah pudi entah talu arah lebe menang arah pudi. Umpamana, lit kalak senang kal tupung ia danak-danak. Kai sura-surana jadi, kai ia merincuh lit, enterem si nami-nami ia. Tapi kenca ia metua, lanai lit si mperdiateken ia, arus ia erdahin encariken nakan ras keperluan, janah geluhna pe kelungunen erkiteken lanai lit sima-simana. Bage pe lit ka kalak, tuhu sanga ia danak-danak seh kal meserana. Nakanna pe gadung, arus ka ia erdahin guna kerina keperluan geluhna, la lit waktuna pe erguro-guro. Tapi kenca ia mbelin enggo sikap geluhna seh metuana pe cukup kerina keperluan geluhna. Adi ipilih apai nge pangen kita si pemena ras si peduaken? Reh nina kalak njababsa, adi banci pandita, kitik-kitikna ermanja-manja, mbelinna pe bayak namura, sanga lansia pe erminak denga, metena pe masuk surga. Memang adi banci bage, eme arapen kerina kalak. Tapi kinatana i bas kegeluhen enda maun ibere Dibata kita ngenanami kiniseran. Saja perlu usur si eteh maka kune lit pe kiniseran si inanami kita labo e erbansa kita bene i bas kiniteken.

Enda me si jadi man bangsa Israel. Tupung ia erdosa la pernah la iukum Tuhan bangsa enda. Tapi ukumen e dalam Dibata nehken keleng ate si tuhu-tuhu gelah banci robah ia mulihi janah idatna mulihi dalam kegeluhen si tuhu-tuhu. Enda me si icidahken i bas ogenta sendah maka tuhu bangsa enda iukum 70 tahun i Babil tapi bagi janji Dibata i jenda maka itebusiNa janah itaruhkenNa mulih ku negerina seh maka rende dingin ersurak-surak bangsa enda

Bagenda min kita ngidah perbahanen Dibata i bas geluhta. Banci jadi sipemena ndai si dalani kita ntah si peduaken. Siapa pe mari si peteguhi kinitekenta man baNa janah si la uli siakap banci iubahNa ku bas kemalemen ate alu perjuangan ras IA.